

MALAYSIA
DEWAN RAKYAT
ATURAN URUSAN MESYUARAT

NASKAH SAHIIH/BAHASA MALAYSIA

<http://www.parlimen.gov.my>

HARI RABU, 22 MAC 2023, PUKUL 10.00 PAGI

Bil. 24

PERTANYAAN-PERTANYAAN BAGI JAWAB LISAN

1. PR-1521-L18287

Dato' Seri Amirudin bin Shari [Gombak] minta **MENTERI PERDAGANGAN ANTARABANGSA DAN INDUSTRI** menyatakan perancangan MITI dalam mengenal pasti dan meneroka industri baharu bagi tujuan TVET supaya meningkatkan peluang pekerjaan dalam industri baharu berteknologi tinggi. Berpandukan industri sedia ada, apakah kekurangan penawaran graduan TVET berdasarkan permintaan industri serta langkah yang akan diambil untuk mengatasi kelompangan ini.

2. PR-1521-L19300

Tan Sri Dato' Haji Mahiaddin bin Haji Mohd. Yassin [Pagoh] minta **MENTERI EKONOMI** menyatakan strategi dan langkah-langkah yang akan diambil oleh Kerajaan untuk mempercepat pemulihan ekonomi negara khususnya bagi memenuhi keperluan kumpulan rentan dan perusahaan mikro, kecil dan sederhana (PMKS).

3. PR-1521-L18724

Dr. Kelvin Yii Lee Wuen [Bandar Kuching] minta **PERDANA MENTERI** menyatakan tentang perkembangan pengumuman Kerajaan untuk meminda Seksyen 309 Kanun Keseksaan untuk *decriminalise attempted suicide* untuk menangani isu peningkatan jumlah cubaan membunuh diri di seluruh Malaysia.

4. PR-1521-L19238

Dato' Khilir bin Mohd Nor [Ketereh] minta **MENTERI PERTAHANAN** menyatakan adakah terdapat perancangan untuk penambahbaikan kadar pemberian pencen hilang upaya yang ketika ini diberikan pada anggota yang hilang upaya dari darjah 20% hingga 100% anggota badan.

5. PR-1521-L18651
Puan Rodiyah binti Sapiee [Batang Sadong] minta **MENTERI PERDAGANGAN DALAM NEGERI DAN KOS SARA HIDUP** menyatakan adakah Kementerian akan menilai semula dasar-dasar kepenggunaan terutama Dasar Pengguna Negara memandangkan fokus Kementerian telah bertambah kepada isu kos sara hidup.
6. PR-1521-L19027
Datuk Haji Ahmad Amzad bin Mohamed @ Hashim [Kuala Terengganu] minta **MENTERI SAINS, TEKNOLOGI DAN INOVASI** menyatakan selaras dengan Dasar Bioteknologi Negara 2.0 yang telah dilancarkan pada tahun lepas, bagaimana perancangan Kerajaan agar pelaksanaan dasar ini dapat memperkukuh ekosistem bioteknologi sedia ada bagi menyelesaikan cabaran negara seperti sekuriti makanan.
7. PR-1521-L18848
Tuan Yuneswaran A/L Ramaraj [Segamat] minta **MENTERI KOMUNIKASI DAN DIGITAL** menyatakan perancangan khusus untuk menaik taraf capaian internet serta rangkaian telekomunikasi di Parlimen Segamat dan apakah bentuk pembangunan fasiliti telekomunikasi yang sedang difokuskan di kawasan-kawasan luar bandar Segamat termasuklah *hotspots* banjir.
8. PR-1521-L18917
Tuan Zulkifli bin Ismail [Jasin] minta **MENTERI PENDIDIKAN TINGGI** menyatakan sejauh manakah Kementerian bersetuju menguatkuasakan Akta Bahasa Kebangsaan di institusi pengajian tinggi terutama dalam sesi pengajaran dan pembelajaran.
9. PR-1521-L18268
Datuk Seri Dr. Noraini Ahmad [Parit Sulong] minta **PERDANA MENTERI** menyatakan mekanisme dalam menjadikan konsep Madani untuk penerapan dalam dasar negara serta pelaksanaan program khusus secara menyeluruh dan tidak sekadar hanya slogan semata.
10. PR-1521-L19064
Tuan Haji Mohd Misbahul Munir bin Masduki [Parit Buntar] minta **PERDANA MENTERI** menyatakan apakah faktor utama berlaku gejala murtad dan apakah tindakan JAKIM bagi membendung gejala murtad ini.

11. PR-1521-L18488

Puan Rodziah binti Ismail [Ampang] minta **MENTERI PERDAGANGAN ANTARABANGSA DAN INDUSTRI** menyatakan apakah rasional Kerajaan Persekutuan meratifikasi *Comprehensive and Progressive Agreement for the Trans-Pacific Partnership* (CPTPP) pada 30 September 2022 di samping penjelasan tuntas bagi pelbagai persoalan berbangkit dan langkah mempersiapkan industri tempatan berdepan dengan impak ratifikasi ini.

12. PR-1521-L18054

Dato' Sri Ikmal Hisham bin Abdul Aziz [Tanah Merah] minta **MENTERI PERTAHANAN** menyatakan berapa peruntukan yang disediakan oleh Kerajaan bagi program pembinaan rumah baharu dan juga program pembaikan rumah untuk Veteran Angkatan Tentera Malaysia (ATM) dari kelompok B40 bagi tahun 2023.

13. PR-1521-L18507

Dato' Haji Shamsulkahar bin Mohd Deli [Jempol] minta **MENTERI PENDIDIKAN TINGGI** menyatakan apakah terdapat perancangan Kementerian atau agensi berkaitan bagi membina suatu cawangan institut pengajian tinggi di daerah Jempol bagi memastikan agenda pembelajaran sepanjang hayat dapat dijayakan untuk manfaat penduduk setempat.

14. PR-1521-L19347

Datuk Wira Hajah Mas Ermieyati binti Samsudin [Masjid Tanah] minta **MENTERI KOMUNIKASI DAN DIGITAL** menyatakan apakah komitmen Kementerian dalam memastikan liputan capaian internet 4G dan gentian optik di Parlimen Masjid Tanah. Bagaimanakah usaha sama yang dimainkan secara tuntas dengan Melaka ICT Holdings Sdn. Bhd. (MICTH).

15. PR-1521-L(5)00163

Tuan Cha Kee Chin [Rasah] minta **MENTERI EKONOMI** menyatakan secara terperinci bagaimana peruntukan RM750 juta di bawah Inisiatif Pendapatan Rakyat (IPR) akan dilaksanakan demi kepentingan dan manfaat kepada 130,000 rakyat dari golongan termiskin.

[Pertanyaan di bawah PM 22(5)]

16. PR-1521-L19127

Dato' Rosol bin Wahid [Hulu Terengganu] minta **MENTERI PERDAGANGAN ANTARABANGSA DAN INDUSTRI** menyatakan apakah usaha yang telah diambil untuk menurunkan harga kereta keluaran Malaysia yang dilihat akan dapat membantu meringankan beban rakyat terutama golongan muda yang baru menceburi bidang pekerjaan dalam situasi ketidaktentuan ekonomi ini.

17. PR-1521-L19437
Dr. Richard Rapu @ Aman anak Begri [Betong] minta **MENTERI PENDIDIKAN TINGGI** menyatakan sama ada Kementerian mempunyai perancangan untuk menawarkan program Ijazah Perubatan Veterinar di Universiti Putra Malaysia, Kampus Bintulu, Sarawak dan apakah syarat bagi penawaran program baru tersebut.
18. PR-1521-L19218
Tuan Rushdan bin Rusmi [Padang Besar] minta **MENTERI KOMUNIKASI DAN DIGITAL** menyatakan sejauh mana Kementerian melihat pencemaran gelombang talian mudah alih di sempadan Malaysia - Thailand terutama Padang Besar yang mengganggu isyarat rangkaian mudah alih dari pembekal di Malaysia.
19. PR-1521-L19427
Tuan Zahir bin Hassan [Wangsa Maju] minta **PERDANA MENTERI** menyatakan :
(a) pencapaian terkini projek-projek Residensi Wilayah (dahulunya RUMAWIP) berbanding perancangan; dan
(b) penjelasan khusus mana mungkin pembeli rumah Residensi Hektar di Wangsa Maju kini mula membayar ansuran pinjaman penuh ketika projek masih belum siap dan jangkaan tarikh siap telah beberapa kali dilanjutkan.
20. PR-1521-L19152
Dato' Haji Mohd Suhaimi bin Abdullah [Langkawi] minta **MENTERI PERTAHANAN** menyatakan adakah Kementerian Pertahanan masih berhasrat meneruskan Program Perumahan untuk warga Angkatan Tentera Malaysia (ATM) yang telah dirancang sebelum ini iaitu meningkatkan bilangan rumah keluarga angkatan tentera dan program Satu Anggota, Satu Rumah (SASAR).
21. PR-1521-L17997
Tuan Tan Kok Wai [Cheras] minta **PERDANA MENTERI** menyatakan dasar semasa mengenai pembangunan semula kawasan-kawasan lama di Kuala Lumpur, terutamanya dari segi keperluan dan syarat yang perlu dipenuhi oleh pihak pembangun flat dan pangsapuri awam dan persendirian dan apakah perlindungan yang ada untuk melindungi kepentingan pemilik hartanah yang terkesan atau penghuni mereka.

22. PR-1521-L19275

Datuk Che Mohamad Zulkifly bin Jusoh [Besut] minta **PERDANA MENTERI** menyatakan apakah tindakan yang telah diambil oleh Kerajaan bagi menyiasat dakwaan campur tangan mantan Peguam Negara dalam isu perlantikan hakim-hakim mahkamah.

23. PR-1521-L19423

Puan Young Syefura binti Othman [Bentong] minta **MENTERI KOMUNIKASI DAN DIGITAL** menyatakan perancangan Kementerian untuk naik taraf capaian internet dan telekomunikasi di sekitar Parlimen Bentong terutamanya di kawasan jauh dari bandar Bentong seperti Pelangai, Janda Baik, Mompaga, Chamang dan lain-lain.

24. PR-1521-L18576

Dr. Hajah Halimah Ali [Kapar] minta **PERDANA MENTERI** menyatakan adakah Kerajaan akan menyalur peruntukan untuk khidmat rakyat kepada semua Pusat Khidmat Ahli Dewan Rakyat seperti dalam manifesto PH bagi menjamin peruntukan sama rata untuk semua ahli Parlimen termasuk pembangkang.

25. PR-1521-L18272

Tuan Manndzri bin Nasib [Tenggara] minta **MENTERI PERDAGANGAN ANTARABANGSA DAN INDUSTRI** menyatakan perancangan dan usaha Kementerian untuk memperkasa dan mengupaya taman-taman perindustrian yang sedia wujud agar lebih berdaya maju untuk memberi lebih banyak peluang pekerjaan kepada rakyat.

26. PR-1521-L18884

Datuk Seri Takiyuddin bin Hassan [Kota Bharu] minta **PERDANA MENTERI** menyatakan adakah Kerajaan akan melaksanakan cadangan Peguam Negara agar edisi Perlembagaan Persekutuan versi Bahasa Melayu menjadi versi rasmi menggantikan teks asal dalam Bahasa Inggeris.

27. PR-1521-L18123

Tuan Sim Tze Tzin [Bayan Baru] minta **MENTERI KOMUNIKASI DAN DIGITAL** menyatakan komitmen Kementerian kepada kebebasan media ekoran dakwaan 2 Ketua Editor, The Edge, Azam Aris dan M Shamugan di bawah Seksyen 500 Kanun Keseksaan dan penukaran Ketua Editor Ahmad Lokman Mansor di NSTP akibat campur tangan parti politik. Bagaimanakah Kementerian membantu meningkatkan gaji dan kebajikan pengamal media seperti didedahkan oleh bekas penyampai berita BERNAMA, Sydney Yap Xi Ni.

28. PR-1521-L18773
Tuan Haji Mohd Hasnizan bin Harun [Hulu Selangor] minta **PERDANA MENTERI** menyatakan kaedah agihan peruntukan bagi pembangunan, geran dan pusat khidmat.
29. PR-1521-L19451
Tuan Lim Lip Eng [Kepong] minta **PERDANA MENTERI** menyatakan adakah bekas Ketua Pegawai Eksekutif ASTRO Malaysia Holdings Bhd, Rohana Rozhan sudah mengembalikan wang USD10 juta kepada Kerajaan. Berapa aset 1MDB yang telah dikembalikan kepada Kerajaan dan berapa hutang 1MDB yang masih harus dibayar oleh Kerajaan.
30. PR-1521-L19368
Tan Sri Haji Abdul Hadi bin Awang [Marang] minta **PERDANA MENTERI** menyatakan apakah jaminan Kerajaan untuk memastikan konsep federalisme antara Kerajaan Persekutuan dan Kerajaan negeri dihormati dan hak rakyat diberikan secara adil dan saksama.
31. PR-1521-L18176
Tuan Oscar Ling Chai Yew [Sibü] minta **MENTERI PERTAHANAN** menyatakan status perolehan *Fighter Lead-In Trainer - Light Combat Aircraft* serta sama ada syarikat perantara dilantik dalam perolehan ini.
32. PR-1521-L19231
Tuan Mohd Syahir bin Che Sulaiman [Bachok] minta **MENTERI EKONOMI** menyatakan kriteria untuk mempercepat pelaksanaan projek berimpak tinggi dalam semakan semula Bajet 2023, terutama yang dapat memberi kesan limpahan berganda kepada negara dan pendapatan rakyat.
33. PR-1521-L18206
Tuan Azli bin Yusof [Shah Alam] minta **MENTERI PENDIDIKAN TINGGI** menyatakan strategi Kementerian dalam menangani keterlembihan bilangan dan ketidaksepadanan jurusan graduan berbanding keperluan pekerjaan semasa.
34. PR-1521-L18840
Tuan Haji Kamal bin Ashaari [Kuala Krau] minta **PERDANA MENTERI** menyatakan status penyata hutang peneroka FELDA yang sehingga kini tidak wujud yang menyebabkan peneroka FELDA tidak jelas akan perincian hutang yang harus dibayar oleh mereka.

35. PR-1521-L19081

Tuan Gobind Singh Deo [Damansara] minta **PERDANA MENTERI** menyatakan status siasatan terhadap dakwaan penyelewengan RM92.5juta dari Pakej Rancangan Ekonomi. Adakah tindakan akan diambil dan apakah tindakan itu.

36. PR-1521-L18384

Tuan Kalam bin Salan [Sabak Bernam] minta **MENTERI KOMUNIKASI DAN DIGITAL** menyatakan mengapa capaian internet jalur lebar yang sangat lemah di Sungai Air Tawar, Sabak Bernam, Selangor dan cabaran yang dihadapi untuk membolehkan lebih ramai penduduk menikmati faedah internet jalur lebar.

37. PR-1521-L18425

Tuan Wong Chen [Subang] minta **PERDANA MENTERI** menyatakan langkah-langkah proaktif yang akan diambil oleh Kerajaan untuk mengubah Akta Pembangunan Petroleum 1974 untuk mengehadkan kuasa budi bicara Perdana Menteri justeru memastikan Petronas melapor kepada Parlimen Malaysia.

38. PR-1521-L18311

Tuan Lim Guan Eng [Bagan] minta **MENTERI KOMUNIKASI DAN DIGITAL** menyatakan apakah manfaat daripada pelaburan RM4 bilion oleh Kerajaan Persekutuan untuk membina infrastruktur 4G di kawasan luar bandar bila kos kepada pengguna adalah lebih mahal daripada kos yang ditawarkan oleh syarikat pembekal 5G.

39. PR-1521-L18621

Dato' Dr. Ahmad Yunus bin Hairi [Kuala Langat] minta **MENTERI KOMUNIKASI DAN DIGITAL** menyatakan :

- (a) status capaian internet seluruh negara; dan
- (b) apakah halangan yang dihadapi bagi memungkinkan capaian internet 100% di Lembah Klang dan seluruh negeri Selangor.

40. PR-1521-L18013

Tuan William Leong Jee Keen [Selayang] minta **MENTERI PERDAGANGAN DALAM NEGERI DAN KOS SARA HIDUP** menyatakan langkah-langkah untuk memansuhkan *Approved Permit (AP)* dan permit lain yang memberikan kuasa kepada monopoli dan kartel untuk menguasai harga barang yang mengakibatkan kos sara hidup tinggi.

41. PR-1521-L18265
Datuk Seri Johari bin Abdul Ghani [Titiwangsa] minta **PERDANA MENTERI** menyatakan berapa jumlah penjaja dan peniaga kecil di sekitar ibu kota Kuala Lumpur setakat Disember 2022 dan berapa jumlah lesen yang telah dikeluarkan oleh DBKL kepada penjaja dan peniaga kecil berkenaan.
42. PR-1521-L19477
Dato' Seri Hishammuddin bin Tun Hussein [Sembrong] minta **MENTERI EKONOMI** menyatakan adakah Kerajaan bercadang untuk memperhalusi semula kaedah pengkategorian garis kemiskinan di Malaysia memandangkan beliau sebagai Pengerusi Kaukus Reformasi dan Tadbir Urus Parlimen pernah mengakui kadar sebenar kemiskinan negara mungkin lebih tinggi semasa dialog Digital Native Agenda pada 2019.
43. PR-1521-L18637
Datuk Seri Panglima Haji Mohd Shafie bin Haji Apdal [Semporna] minta **MENTERI PERDAGANGAN DALAM NEGERI DAN KOS SARA HIDUP** menyatakan memandangkan harga barangan yang tidak terkawal serta gangguan bekalan makanan yang masih berlaku di seluruh negara, apakah langkah-langkah yang diambil oleh Kementerian selain daripada penguatkuasaan, perundangan dan kaedah kawalan harga barangan semasa bagi mengatasi masalah ini.
44. PR-1521-L18462
Datuk Seri M. Saravanan [Tapah] minta **PERDANA MENTERI** menyatakan apakah hala tuju dan sasaran Jawatankuasa Tindakan Hal Ehwal Masyarakat India (Indian Affair Action Commitee) serta fungsi jawatan kuasa dalam menyelesaikan isu masyarakat India dan bukan sekadar melepaskan batok di tangga.
45. PR-1521-L18684
Tuan Afnan Hamimi bin Taib Azamuddin [Alor Setar] minta **MENTERI PENDIDIKAN TINGGI** menyatakan apakah usaha yang diambil untuk menjadikan bidang perubatan dan pengubatan Islam sebagai salah satu subjek yang diajar dan diiktiraf oleh pihak Kementerian supaya setaraf dengan ilmu perubatan yang sedia ada.
46. PR-1521-L18140
Dato' Sri Richard Riot anak Jaem [Serian] minta **PERDANA MENTERI** menyatakan sejauh manakah cadangan Kerajaan untuk memperuntukkan 1/3 dari kerusi Parlimen kepada Sabah dan Sarawak.

47. PR-1521-L18301

Tuan Haji Aminolhuda bin Hassan [Sri Gading] minta **PERDANA MENTERI** menyatakan berapa jumlah rang undang-undang berkaitan pentadbiran agama Islam telah dibentangkan di Parlimen dari tahun 2018 hingga 2022 dan apakah perancangan seterusnya.

48. PR-1521-L18522

Dato' Seri Haji Aminuddin bin Harun [Port Dickson] minta **PERDANA MENTERI** menyatakan apakah usaha dan tindakan tegas pihak Kerajaan dalam membendung kelompok yang atas nama agama mengeluarkan hukum-hukum atau tafsiran yang bercanggah dengan roh Islam agama sejahtera, agama kasih sayang, dan agama perpaduan.

49. PR-1521-L18956

Tuan Muhammad Ismi bin Mat Taib [Parit] minta **MENTERI PERDAGANGAN DALAM NEGERI DAN KOS SARA HIDUP** menyatakan usaha-usaha yang akan dilakukan oleh Kementerian bagi menghapuskan kewujudan kartel dalam sektor bahan makanan bagi menggalakkan persaingan dan membasmi kegiatan mengaut keuntungan melampau.

50. PR-1521-L19409

Dato' Sri Ismail Sabri bin Yaakob [Bera] minta **MENTERI PERDAGANGAN DALAM NEGERI DAN KOS SARA HIDUP** menyatakan apakah perancangan pihak Kementerian bagi membantu rakyat khususnya golongan B40 mendepani peningkatan kos sara hidup serta impak ketidaktentuan ekonomi dunia yang diramal berlaku pada tahun 2023.

51. PR-1521-L19042

Tuan Muhammad Fawwaz bin Mohamad Jan [Permatang Pauh] minta **PERDANA MENTERI** menyatakan jumlah premis KAFA seluruh negara serta jelaskan perancangan bagi menaik taraf infrastruktur premis KAFA yang berada dalam keadaan kedaifan kelas yang sesak padat.

52. PR-1521-L18761

Dato' Hajah Mumtaz binti Md Nawli [Tumpat] minta **PERDANA MENTERI** menyatakan sejauh manakah pemeraksanaan kemahiran dan kelengkapan pegawai dan anggota sukarelawan Angkatan Pertahanan Awam Malaysia (APM) di seluruh negara selari dengan pelan tindakan Kerajaan kepada sebagai barisan hadapan ketiga negara dalam menghadapi situasi darurat dan kecemasan.

53. PR-1521-L19131

Dato' Seri Dr. Shahidan bin Kasim [Arau] minta **MENTERI EKONOMI** menyatakan status terkini agihan peruntukan Perbelanjaan Pembangunan Asas Persekutuan kepada 6 negeri kurang membangun khususnya Perlis bagi penyediaan infrastruktur dan kemudahan asas agar dapat menjana lebih banyak peluang ekonomi berdasarkan Pelan Rancangan Malaysia Ke-12 (RMK-12).

54. PR-1521-L18441

Tuan Wong Kah Woh [Taiping] minta **PERDANA MENTERI** menyatakan sama ada Kerajaan bersedia untuk memulakan kerja-kerja persempadanan semula kawasan pilihan raya dan memastikan prinsip "*One Man, One Vote, One Value*" adalah terjamin.

55. PR-1521-L19026

Tuan Sabri bin Azit [Jerai] minta **PERDANA MENTERI** menyatakan :

- (a) adakah proses kajian untuk menaik taraf kontrak guru KAFA kepada taraf tetap telah selesai; dan
- (b) sebab para guru KAFA tidak dapat menikmati elaun minimum RM1500 dalam perkhidmatan mereka.

56. PR-1521-L18043

Tuan Fong Kui Lun [Bukit Bintang] minta **PERDANA MENTERI** menyatakan bilangan sindiket *scam* yang memangsakan rakyat, amaun yang terlibat dan tindakan yang diambil untuk mengatasi masalah *scam* tersebut.

57. PR-1521-L(5)00156

Tuan Jimmy Puah Wee Tse [Tebrau] minta **PERDANA MENTERI** menyatakan jumlah warga Rohingya di Malaysia mengikut pecahan negeri dan apakah status terkini dan perancangan akhir Kementerian untuk mereka di Malaysia bagi menyelesaikan isu dari segi aspek sosial dan kesejahteraan masyarakat tempatan.

[Pertanyaan di bawah PM 22(5)]

ATURAN URUSAN MESYUARAT DAN USUL-USUL

1. **Menyambung semula pertimbangan ke atas Rang Undang-undang Perbekalan 2023 (D.R.2/2023) dan Usul Anggaran Perbelanjaan Pembangunan 2023 seperti berikut :**

“Bahawa Dewan ini, menurut subseksyen 4(3) Akta Kumpulan Wang Pembangunan 1966 [Akta 406], membuat ketetapan bahawa suatu jumlah wang sebanyak tidak lebih dari sembilan puluh sembilan bilion ringgit (RM99,000,000,000) dibelanjakan daripada Kumpulan Wang Pembangunan bagi tahun 2023, dan bagi tujuan dan butiran Perbelanjaan Pembangunan yang dinyatakan di bawah Maksud Pembangunan atau (“P”) dalam senarai Anggaran Perbelanjaan Persekutuan 2023, yang dibentangkan sebagai Kertas Perintah 19 Tahun 2023, adalah diuntukkan di bawah Maksud-maksud yang berkenaan jumlah-jumlah yang bersementara dengan butiran-butiran itu di ruangan enam dan tujuh senarai tersebut, dan bahawa Usul yang telah diluluskan oleh Dewan ini pada 20 Disember 2022 mengenai perbelanjaan yang dibelanjakan daripada Kumpulan Wang Pembangunan bagi tahun kewangan 2023 adalah dibatalkan dan hendaklah disahkan.”

Dalam Jawatankuasa Sebuah-buah Majlis (21 Mac 2023)

- | | | | |
|----|----------------|--|-----------------------------------|
| 2. | (D.R 4/2023) | Rang Undang-Undang Kewangan 2023

[Menteri Kewangan] | Bacaan Kali
Yang Kedua |
| 3. | (D.R 3/2023) | Rang Undang-Undang Levi Keuntungan Luar Biasa (Pengesahan) 2023

[Menteri Kewangan] | “ |
| 4. | (D.R 1/2023) | Rang Undang-Undang Pencetakan Teks Al-Qur'an (Pindaan) 2023.

[Menteri Dalam Negeri] | “ |
| 5. | (D.R 5/2023) | Rang Undang-Undang Kanun Keseksaan (Pindaan) 2023.

[Perdana Menteri] | “ |
| 6. | (D.R 6/2023) | Rang Undang-Undang Kanun Tatacara Jenayah (Pindaan) 2023.

[Perdana Menteri] | “ |

7. **Menteri Kewangan** akan mencadangkan :

"Bahawa Dewan ini, mengikut peruntukan perenggan 8(3)(a)(iv) Akta Tatacara Kewangan 1957 [Akta 61], mengambil ketetapan bersetuju supaya Kerajaan Malaysia melalui Menteri Kewangan (Diperbadankan) membuat pelaburan dengan menukar baki pinjaman Kerajaan Malaysia sebanyak RM165,282,814.00 kepada UDA Holding Berhad (UDA), sebuah syarikat dimiliki sepenuhnya oleh Menteri Kewangan (Diperbadankan) kepada ekuti (modal saham) bersamaan Seratus Enam Puluh Lima Juta Dua Ratus Lapan Puluh Dua Ribu Lapan Ratus Empat Belas (165,282,814) unit saham biasa pada nilai RM1 bagi satu unit saham."

8. PR-1521-U(27)231

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya menyegerakan pembinaan dan baik pulih tembok sempadan Malaysia - Thailand supaya merangkumi keseluruhan perbatasan dari Perlis hingga Kelantan dan menyediakan suatu pelan tindakan komprehensif merangkumi semua agensi Kerajaan bagi kawalan sempadan Malaysia-Thailand. Sempadan Malaysia - Thailand adalah sepanjang kira-kira 656 km namun hanya 111 km sahaja yang berpagar. Sebahagian tembok sempadan antara Malaysia dan Thailand di sepanjang Laluan Keselamatan dan Pembangunan (KESBAN) dilihat sudah usang manakala peralatan kamera litar tertutup (CCTV) dan alat pengimbas perlu ditambah, dibaik pulih dan dinaik taraf dengan teknologi terkini seperti penggunaan dron. Beberapa insiden pada masa lalu seperti kes tembakan ke atas pasukan keselamatan negara dan bermaharajalelanya sindiket pemerdagangan manusia seperti yang berlaku di insiden Wang Kelian serta penyeludupan barangan termasuk dadah dan senjata menunjukkan betapa kritikalnya keperluan untuk meningkatkan tahap keselamatan di perbatasan. Kerajaan Malaysia sebelum ini telah memberikan komitmen untuk membina tembok sempadan tersebut tetapi sehingga terkini masih tiada pelan pembangunan komprehensif dan terperinci yang diumumkan. Mohon pihak Kerajaan memandang serius perkara ini dengan menyegerakan pembangunan tembok sempadan Malaysia - Thailand secara menyeluruh dan memastikan suatu pelan komprehensif merangkumi semua agensi Kerajaan bagi kawalan sempadan Malaysia - Thailand agar benar-benar berkesan menjamin keselamatan perbatasan negara."

[Menteri Dalam Negeri]

9. PR-1521-U(27)232

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan menubuhkan badan siasatan bebas bagi mengenal pasti secara terperinci punca utama yang menyebabkan kekurangan bekalan bahan makanan mentah seperti ayam dan telur ayam di pasaran serta merangka perancangan penyelesaian jangka pendek dan panjang yang komprehensif termasuk penguatkuasaan terhadap golongan kartel orang tengah serta menambahkan daya pengeluaran bekalan bahan mentah tempatan. Rakyat baik dari kalangan pengguna mahupun pengusaha restoran kecil masih mengeluh dengan permasalahan ini yang menyebabkan kenaikan harga bahan makanan mentah. Kerajaan tidak seharusnya melepaskan tanggungjawab menjaga keterjaminan bekalan bahan mentah makanan kepada individu (sebagai *end user*) mahupun menyarankan penyelesaian jalan mudah seperti menambah import makanan tetapi mencari penyelesaian sepanjang rangkaian jaringan bekalan bahan makanan mentah."

[Menteri Pertanian dan Keterjaminan Makanan]

10. PR-1521-U(27)233

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya mengkaji dan merancang satu inisiatif khas bagi memastikan setiap rakyat dan keluarga Malaysia terutamanya dari golongan B40 dan M40 mampu memiliki kediaman pertama dengan menyediakan rumah mampu milik berharga RM200,000 dan ke bawah baik di luar dan di dalam bandar. Dasar Perumahan Negara (2018 - 2025) sendiri memperakui bahawa isu kemampuan memiliki rumah semakin ketara di kalangan rakyat dan impak kenaikan harga rumah yang mendadak turut dirasai golongan M40 selain B40. Inisiatif khas untuk menyediakan kemudahan rumah pertama pada harga di bawah RM200,000 dan ke bawah ini hendaklah dijadikan salah satu sasaran kajian semula Dasar Perumahan Negara dan memerlukan input dari pelbagai agensi dan Kementerian serta pihak bukan Kerajaan dan bukan dari satu Kementerian sahaja. Isu kemampuan memiliki rumah pertama jika tidak ditangani akan mewujudkan generasi rakyat yang sentiasa menyewa tanpa mendapat peluang memiliki perumahan sendiri. Golongan generasi ini akan terus menjadi mangsa kepada harga hartanah yang melambung akibat spekulasi hartanah dan tanpa kawalan harga sehingga menjadikan harga di luar kemampuan sebenar golongan M40 dan B40. "

[Menteri Pembangunan Kerajaan Tempatan]

11. PR-1521-U(27)234

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya agihan peruntukan pembangunan dan pelaksanaan projek pembangunan kepada enam negeri kurang membangun, iaitu Kedah, Kelantan, Perlis, Sabah, Sarawak dan Terengganu seperti yang direncanakan di dalam Pelan Rancangan Malaysia Ke-12 (RMK-12) dapat dilaksanakan secepat mungkin. Berdasarkan pelan RMK-12 tersebut, enam negeri kurang membangun akan terus diberi keutamaan dengan agihan sekurang-kurangnya 50% daripada keseluruhan peruntukan Perbelanjaan Pembangunan Asas Persekutuan. Ini akan mempercepatkan penyediaan infrastruktur dan kemudahan asas serta menjana lebih banyak peluang ekonomi di negeri kurang membangun dan mengurangkan jurang pembangunan."

[Menteri Ekonomi]

12. PR-1521-U(27)235

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya mengkaji semula peruntukan khas yang boleh diberikan kepada pekebun kecil, penternak dan nelayan yang terjejas akibat bencana alam seperti banjir dan musim tengkujuh. Kerosakan tanaman dan kematian ternakan sering kali mendatangkan kerugian besar hingga kepada jutaan ringgit setiap kali berlaku bencana alam. Dengan situasi semasa ekonomi negara yang tidak stabil juga secara tidak langsung akan memberi tekanan kepada kos sara hidup pekebun kecil, penternak dan nelayan yang kebanyakannya bergantung harap kepada sumber pendapatan tersebut sahaja. Maka pemberian peruntukan khas ini dapat menambah baik kehidupan mereka."

[Menteri Pertanian dan Keterjaminan Makanan]

13. PR-1521-U(27)236

Dato' Seri Dr. Shahidan bin Kasim [Arau] akan mencadangkan :

Kerajaan supaya mengkaji dan merancang satu inisiatif khas bagi memastikan setiap rakyat dan keluarga Malaysia terutamanya dari golongan B40 dan M40 mampu memiliki kediaman pertama dengan menyediakan rumah mampu milik berharga RM200,000 dan ke bawah baik di luar dan di dalam bandar. Dasar Perumahan Negara (2018-2025) sendiri memperakui bahawa isu kemampuan memiliki rumah semakin ketara di kalangan rakyat dan impak kenaikan harga rumah yang mendadak turut dirasai golongan M40 selain B40. Inisiatif khas untuk menyediakan kemudahan rumah pertama pada harga di bawah RM200,000 dan ke bawah ini hendaklah

dijadikan salah satu sasaran kajian semula Dasar Perumahan Negara dan memerlukan input dari pelbagai agensi dan Kementerian serta pihak bukan Kerajaan dan bukan dari satu Kementerian sahaja. Isu kemampuan memiliki rumah pertama jika tidak ditangani akan mewujudkan generasi rakyat yang sentiasa menyewa tanpa mendapat peluang memiliki perumahan sendiri. Golongan generasi ini akan terus menjadi mangsa kepada harga hartanah yang melambung akibat spekulasi hartanah dan tanpa kawalan harga sehingga menjadikan harga di luar kemampuan sebenar golongan M40 dan B40. "

[Perdana Menteri]

14. PR-1521-U(27)237

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan melaksanakan satu perancangan persediaan dan pengurusan risiko bagi menghadapi bencana alam dapat disemak semula akibat impak perubahan iklim yang sangat drastik sejak kebelakangan ini. Hal demikian kerana perancangan rapi penting bagi memastikan tahap kesiapsiagaan anggota terlibat berada di tahap yang tinggi. Di samping itu, Kerajaan juga perlu merencana satu langkah holistik bagi mendidik masyarakat agar bersiap siaga untuk menghadapi bencana alam kerana kesedaran terhadap isu ini di dalam kalangan masyarakat masih berada di tahap yang rendah berdasarkan peristiwa bencana alam yang lepas."

[Perdana Menteri]

15. PR-1521-U(27)238

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan menyemak semula garis panduan Suruhanjaya Komunikasi Multimedia Malaysia (SKMM) mengenai isi kandungan media sosial yang sensitif serta tidak sesuai dengan agama Islam dan budaya tempatan seperti kandungan yang *pro-LGBT* dan *pro-liberalisme*. Misalnya, SKMM baru-baru ini telah bekerjasama dengan Polis Diraja Malaysia (PDRM) untuk memantau penyebaran klip-klip video sensitif yang berbaur provokasi dengan niat mencetuskan ketidakharmonian, kebencian dan prejudis. Oleh hal demikian, Kerajaan digesa supaya melakukan tindakan yang sama bagi menangani penularan isi kandungan *pro-LGBT* dan *pro-liberalisme* di media sosial. Tindakan ini adalah penting untuk memastikan martabat Islam sebagai agama rasmi negara terpelihara dan budaya tempatan dihormati. "

[Menteri Komunikasi dan Digital]

16. PR-1521-U(27)239

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya menyediakan perancangan, peruntukan dan prasarana kepada pelajar-pelajar universiti, kolej, STPM dan SPM bagi menghadapi kaedah pembelajaran alaf baru seperti pembelajaran dalam talian dan menggunakan media elektronik. Ini bagi membolehkan dan mendedahkan mereka ke alam teknologi siber dan e-pembelajaran yang semakin berkembang yang seterusnya memerlukan guru-guru yang terlatih dalam pendidikan alaf baru."

[Menteri Pendidikan]

17. PR-1521-U(27)240

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya mewujudkan pusat benih padi khusus di kawasan utara khususnya di Arau, Perlis bagi membekalkan benih-benih padi yang bermutu tinggi dan mencukupi serta membolehkan penyelidikan yang agresif dibuat bagi menghasilkan benih padi baru. Pusat Benih Padi adalah penting untuk mengumpul benih padi yang lebih berdaya komersial, lebih berdaya tahan iklim (*climate resistant*) dan sesuai dengan cuaca di kawasan utara Semenanjung Malaysia. Pusat ini juga boleh berperanan menjalankan kajian di peringkat serantau dan melibatkan penyelidik daripada negara-negara jiran seperti Thailand, Indonesia, Filipina dan Myanmar yang mempunyai tanaman dan baka padi yang berdaya komersial tinggi."

[Menteri Pertanian dan Keterjaminan Makanan]

18. PR-1521-U(27)241

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan menyediakan pelan tindakan yang komprehensif untuk menangani kadar pengangguran semasa yang dijangka meningkat terutamanya di kalangan graduan universiti, penduduk luar bandar dan golongan miskin bandar. Pelan tindakan ini amat diperlukan memandangkan keadaan ekonomi global juga bakal meruncing pada tahun 2023 dan kadar pelaburan asing di Malaysia akan terjejas. Dengan situasi ekonomi terkini, lambakan penganggur akan menyebabkan peningkatan jumlah golongan B40 dan B20 akibat peningkatan kos sara hidup."

[Perdana Menteri]

19. PR-1521-U(27)242

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya meneruskan usaha untuk memberi bantuan semula kepada pesawah menerusi Bajet 2023. Dalam ucapan Bajet 2023 yang lepas, Kerajaan mengumumkan bantuan sebanyak RM200 sebulan bagi tempoh tiga bulan kepada 240 ribu penerima yang layak. Anggaran keseluruhan perbelanjaan bantuan tersebut adalah lebih kurang RM228 juta. Justeru itu, Kerajaan digesa agar mempercepat saluran bantuan tersebut kepada pesawah yang memerlukan bagi menyokong pengorbanan mereka sebagai tonggak utama dalam menghasilkan makanan ruji utama rakyat Malaysia iaitu beras. Kebanyakan petani di utara Semenanjung Malaysia mempunyai kawasan sawah padi yang luas serta subur yang juga sesuai ditanam pelbagai jenis tanaman seperti kelapa sawit. Walau bagaimanapun, para pesawah ini masih meneruskan tanaman padi bagi menjamin kelangsungan makanan ruji utama negara. Oleh hal demikian, Kerajaan diharapkan dapat menghargai pengorbanan para pesawah ini."

[Menteri Pertanian dan Keterjaminan Makanan]

20. PR-1521-U(27)243

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan melaksanakan segera projek-projek tebatan banjir di seluruh negara untuk memastikan projek ini dilaksanakan secara holistik dan dapat mencari jalan penyelesaian kepada isu banjir yang semakin meruncing akibat kesan perubahan iklim dan pembangunan yang tidak mesra alam. Antara projek yang perlu dilaksanakan segera adalah seperti Projek Pembangunan Sungai Bersepadu (PLSB) Sungai Golok (KESBAN) dan Sungai Kelantan. Dengan pembinaan projek tersebut, risiko banjir besar dapat dikurangkan. Di samping itu, projek tebatan banjir di Selangor khususnya di Shah Alam dan bandar Kuala Lumpur juga diharapkan dapat dilaksanakan dengan komprehensif agar dapat menangani masalah banjir kilat."

[Menteri Sumber Asli, Alam Sekitar dan Perubahan Iklim]

21. PR-1521-U(27)244

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya melaksanakan tindakan kawalan yang lebih ketat berkenaan jualan arak. Garis panduan yang khusus perlu dikaji dan diwujudkan oleh Kerajaan bagi mengawal penjualan arak yang meliputi waktu dan tempat jualan arak yang seragam dan boleh diguna pakai di seluruh negara bagi tujuan mengelakkan masalah sosial yang sering timbul seperti masalah

rumah tangga dan kemalangan jalan raya. Oleh hal yang demikian, keseragaman tindakan daripada Kementerian Kewangan dan Pihak Berkuasa Tempatan (PBT) adalah amat diperlukan sekiranya ingin melaksanakan tindakan kawalan yang lebih ketat terhadap jualan arak kerana ketika ini ketidakseragaman tindakan antara dua entiti ini menjadi antara punca kawalan jualan arak tidak dapat dilaksanakan secara efektif dan efisien."

[Menteri Kewangan]

22. PR-1521-U(27)245

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya membentuk satu pasukan petugas khas bagi memberi perhatian terhadap isu pencerobohan sempadan yang berlaku di Sabah dan Sarawak. Seperti di ketahui, Sabah dan Sarawak pula berkongsi sempadan darat sejauh 2,019.5km dengan Kalimantan, Indonesia. Daratan Negara Brunei Darussalam dibatasi sepenuhnya oleh Sarawak sepanjang 481.3km. Kebanyakan kawasan perbatasan Malaysia bersama negara-negara jirannya terletak di kawasan perbukitan yang diliputi hutan tebal dan kawasan perairan laut menyebabkan kawalan terhadap kawasan-kawasan ini sulit dilakukan.

Oleh sebab itu, masalah pencerobohan, penyeludupan, pemerdagangan manusia dan perdagangan narkotik adalah antara isu yang saban tahun masih berlaku dan sukar ditumpaskan. Dengan siapnya Lebuhraya Sematan – Telok Melano juga baru-baru ini secara tidak langsungnya meningkatkan risiko pencerobohan sempadan sama ada melalui darat dan laut terutamanya melalui Taman Negara Tanjong Datu. Oleh hal yang demikian, tindakan segera Kerajaan bagi mencari solusi terbaik kepada masalah kawalan sempadan ini adalah amat diharapkan."

[Menteri Dalam Negeri]

23. PR-1521-U(27)225

Datuk Seri Ir. Dr. Wee Ka Siong [Ayer Hitam] akan mencadangkan :

"Pindaan terhadap Akta Suruhanjaya Pelantikan Kehakiman (JAC) 2009, seiring dengan cadangan serta titah Majlis Raja – Raja Melayu, demi memastikan pelantikan lima daripada sembilan ahli JAC tidak lagi dilakukan oleh Perdana Menteri. Bergerak ke hadapan, adalah wajar untuk Kerajaan Perpaduan meminda Akta JAC 2009 dan Perkara 122B Perlembagaan Persekutuan bagi menghentikan campur tangan eksekutif yang hanya mengikut selera politik semata-mata dalam isu pelantikan hakim, sekali gus dapat mewujudkan kebebasan sistem kehakiman serta menjunjung keluhuran perlembagaan dan kedaulatan undang-undang di dalam Malaysia sepertimana yang terkandung dalam Rukun Negara.

Sebelum ini, negara telah dikejutkan dengan pendedahan oleh mantan Tan Sri Peguam Negara di dalam buku tulisannya yang berjudul, "*My Story: Justice in Wilderness*", yang nyata bertentangan dengan laungan Kedaulatan Undang-undang atau "*Rule of Law*", oleh Kerajaan pimpinan Yang Amat Berhormat Perdana Menteri ke-7. Berdasarkan penulisan beliau, terdapat pelbagai dakwaan mengenai isu pelantikan hakim, campur tangan didalam sistem kehakiman, pendakwaan politik, serta pelbagai pendedahan yang menerbitkan seribu satu persoalan. Pendedahan daripada mantan Tan Sri Peguam Negara tersebut amat membimbangkan, menimbulkan rasa syak wasangka dan persoalan terhadap sistem keadilan, dan juga kepincangan atas doktrin, dengan izin, "*separation of power*" atau pengasingan kuasa di dalam negara kita.

Justeru, saya menyambut baik kenyataan YB Menteri di Jabatan Perdana Menteri (Undang-Undang dan Reformasi Institusi) yang menyatakan bahawa, Jemaah Menteri telah bersetuju dengan cadangan untuk menubuhkan Suruhanjaya Siasatan Diraja (RCI) untuk meneliti mengenai perkara tersebut. Namun, saya fikirkan Kerajaan tidak sepatutnya sekadar berhenti di situ sahaja. Sebaliknya perlu meminda JAC 2009 bagi merealisasikan hasrat murni Kerajaan terutamanya dalam urus tadbir yang baik atau '*good governance*'."

[Perdana Menteri]

24. PR-1521-U(27)226

Datuk Seri Ir. Dr. Wee Ka Siong [Ayer Hitam] akan mencadangkan :

"Pindaan terhadap harga maksimum telur ayam yang berkuat kuasa pada 12 Oktober 2022 di bawah Akta Kawalan Harga dan Anti Pencatutan 2011 dengan menaikkan harga kawalan telur tempatan dari RM0.41 ke RM0.50 sebiji, iaitu pada paras harga yang sama dengan harga telur import dari India. Di samping itu, Kementerian juga boleh mewujudkan "elaun telur secara *top-up*" kepada golongan B40 dengan menampung selisih harga telur sebanyak RM0.09 (RM0.41 -RM0.50) sebiji. Langkah ini boleh meringankan bebanan kewangan keluarga B40 dan turut membantu penternak tempatan mengatasi masalah kos operasi yang meningkat, sekali gus mengatasi masalah kekurangan bekalan telur ayam. Seandainya elaun telur sebanyak RM200 setahun diberikan kepada golongan B40, banyak telur yang boleh dimakan oleh keluarga B40.

Kementerian seharusnya mengutamakan penternak tempatan semasa menangani masalah kekurangan bekalan telur ayam. Ramai penternak atau pengusaha ladang ayam telur terpaksa menampung kos operasi yang tinggi mengeluarkan telur. Kos untuk menghasilkan sebiji telur ayam di ladang kini mencecah RM0.45 sebiji, di mana sebahagian besarnya membabitkan penghasilan makanan ayam. Menurut Laporan Kajian Khas Kos Pengeluaran Ayam Dan Telur oleh Jabatan Perangkaan Malaysia pada Disember 2022, purata kos pengeluaran di peringkat ladang bagi telur adalah RM0.48 sebiji pada September 2022. Penternak tempatan rugi kerana telur tempatan hanya boleh dijual dengan RM0.41 sebiji kerana ada kawalan harga, sedangkan kos menghasilkan sebiji telur telah pun melebihi paras harga tersebut. Kalau rugi, penternak tidak akan membela ayam untuk menghasilkan telur.

Malahan, telur import dari India dijual dengan RM0.50 sebiji, jika Kementerian memansuhkan kawalan harga, harga jualan telur tempatan juga lebih kurang sama iaitu kira-kira RM0.50 sebiji. Maka, cadangan untuk meminda harga kawalan telur tempatan ke RM0.50 sebiji bakal membantu rakyat dan penternak tempatan. Langkah tersebut boleh menjana ekonomi domestik dari sudut penyediaan peluang pekerjaan dan pembayaran cukai dari pihak penternak, kebersihan dan keselamatan telur ayam, kemudahan logistik, penyeliaan dan pembekalan berbanding dengan langkah mengimport telur dari India.

Justeru, Kementerian wajar mempertimbangkan cadangan pindaan kawalan harga telur supaya rakyat dan penternak tempatan tidak lagi terjejas dalam masalah kekurangan bekalan telur yang berpanjangan ini. Elaun telur kepada golongan B40 juga boleh memastikan rakyat terus berkemampuan menikmati makanan asas ini tanpa terjejas oleh kenaikan harga kawalan telur. Telur dan ayam adalah makanan asas rakyat tanpa mengira kaum atau agama, perkara ini harus dijadikan keutamaan."

[Menteri Pertanian dan Keterjaminan Makanan]

25. PR-1521-U(27)227

Dato' Indera Mohd Shahr bin Abdullah [Paya Besar] akan mencadangkan :

"Bahawa Dewan Rakyat menggesa Kerajaan untuk membentangkan langkah-langkah Kerajaan dalam menghadapi Kemelesetan Ekonomi Global pada 2023 seperti yang diramalkan oleh pelbagai institusi kewangan dalam dan luar negara.

Menurut kajian yang dibuat oleh Bank Dunia; dalam menghadapi risiko, di mana bank-bank negara di seluruh dunia telah dan akan secara serentak menaikkan kadar faedah secara mendadak. Kesannya, seluruh dunia akan menghadapi krisis ekonomi dan bakal menuju kepada krisis kewangan yang semestinya akan memberikan impak negatif yang berpanjangan.

Pelbagai kajian dasar, pakej rangsangan dan langkah diplomatik perlu dibuat oleh Kerajaan untuk memastikan negara kita kalis krisis ini dan membolehkan rakyat hidup dalam kestabilan ekonomi yang optimum. Selain itu, krisis ekonomi secara global juga dijangka akan membawa kepada kemerosotan KDNK sebanyak 0.5 peratus pada 2023.

Pertumbuhan ekonomi mesti dipertingkatkan supaya negara kita boleh mencapai penukuhan nilai mata wang dan menarik lebih banyak pelaburan yang strategik di mana akan menyumbang kepada peluang pekerjaan, peningkatan produktiviti, pengukuhan pasaran modal dan mengurangkan kemiskinan rakyat. "

[Menteri Ekonomi]

26. PR-1521-U(27)228

Dato' Indera Mohd Shahar bin Abdullah [Paya Besar] akan mencadangkan :

"Bahawa Dewan Rakyat menggesa Kerajaan untuk membentangkan perancangan Kerajaan untuk mewujudkan sebuah jawatankuasa khas di peringkat jemaah menteri bagi membuat kajian dan perancangan dalam membasmi kemiskinan golongan nelayan. Mengikut rekod lalu yang dibuat, bancian daripada SENDI-LKIM (2008-2017) mendapati bahawa para nelayan hanya memperoleh pendapatan melebihi RM1,200 sahaja. Meskipun Kerajaan sudah menyediakan peruntukan kepada nelayan melalui Elaun Sara Hidup Bantuan Nelayan dan Skim Subsidi Petrol, namun dengan peningkatan kos sara hidup dan keterbatasan akses kepada kemudahan yang disediakan oleh Kerajaan telah menyukarkan dan membebankan para nelayan yang berada di kawasan luar bandar. Tahun 2022, sejumlah RM7 juta diperuntukkan kepada LKIM sebagai modal pusingan pembelian ikan tempatan sebanyak 1,000 tan metrik yang akan ditempatkan di 130 bilik sejuk beku di seluruh negara untuk menghadapi musim tengkujuh. Permasalahan ini berlaku disebabkan penglibatan orang tengah yang menganiaya dan mengambil kesempatan atas usaha para nelayan dengan memberi alasan hasil yang berkurangan disebabkan oleh cuaca buruk dan secara tidak langsung memberikan kesan negatif kepada rantai sekuriti makanan negara. Penerangan yang jelas kepada sistem penyaluran bantuan Kerajaan juga harus ditambah baik terutamanya kepada golongan-golongan yang tidak mahir menggunakan kemudahan internet dan agensi berkaitan haruslah mencari nelayan yang masih belum berdaftar agar bantuan Kerajaan juga boleh dinikmati oleh mereka. Pokoknya, Kerajaan harus meneliti dan menggali dengan lebih mendalam tentang permasalahan yang dihadapi oleh para nelayan. Kita harus memperkasakan saluran bantuan Kerajaan agar tidak berlaku ketirisan dan aktiviti penyalahgunaan kuasa yang digunakan oleh pihak-pihak tertentu. "

[Menteri Pertanian dan Keterjaminan Makanan]

27. PR-1521-U(27)229

Dato' Indera Mohd Shahar bin Abdullah [Paya Besar] akan mencadangkan :

"Bahawa Dewan Rakyat menggesa Kerajaan untuk membentangkan sebuah pelan tindakan khas untuk menghadapi dan mengatasi krisis utiliti terutamanya tenaga elektrik dan bekalan air bersih serta apakah jangkaan kesan kepada rakyat apabila inisiatif Kerajaan mengurangkan pemberian subsidi utiliti.

Krisis tenaga elektrik berpunca dari harga bahan api sangat tinggi yang menyebabkan peningkatan mendadak kos penjanaan elektrik dan pelarasan tarif elektrik melalui mekanisme ICPT. Berdasarkan kepada kos penjanaan yang sangat tinggi ini, semua pengguna elektrik di Semenanjung Malaysia sepatutnya dikenakan surcaj sebanyak 27 sen/kWj bagi tempoh 1 Januari hingga 30 Jun 2023 yang akan menyebabkan peningkatan kos sara hidup sekiranya dilepaskan kepada pengguna sepenuhnya. Sekiranya keseluruhan kos ICPT ditampung melalui subsidi, Kerajaan pula perlu menyediakan peruntukan yang sangat besar dan membebankan.

Krisis sumber air bersih diakibatkan oleh penebangan hutan secara berleluasa dan pembalakan yang tidak terkawal boleh memusnahkan "hutan awan" (*cloud forest*) yang akan mengakibatkan kehilangan sumber air yang berharga selain menyebabkan hakisan tanah dan menjejaskan kualiti sumber air. Pembuangan sampah dan sisa toksik industri juga menyumbang kepada pencemaran air sungai yang boleh menyebabkan masalah gangguan bekalan air tidak berjadual timbul dan menyukarkan rakyat dalam kehidupan seharian dan secara langsung menelan kos yang tinggi bagi meningkatkan tahap capaian bekalan air bersih, tambahan pula kerja-kerja penyelenggaraan dan penggantian peralatan secara berkala di loji rawatan air atau sistem agihan oleh operator bekalan air semestinya memerlukan perbelanjaan yang tinggi.

Oleh hal demikian jaminan tenaga dan air perlu dirangka dengan langkah yang selamat oleh Kerajaan dalam mencapai penggunaan utiliti yang mampan serta efisien dengan penggunaan kos yang rendah serta pengenaan caj tidak membebankan rakyat. Pengalaman krisis tenaga yang dilalui oleh masyarakat di Eropah perlu diambil sebagai panduan dan perkara yang perlu dirujuk dalam membuat sebarang pertimbangan pada masa kini dan hadapan."

[Menteri Sumber Asli, Alam Sekitar dan Perubahan Iklim]

28. PR-1521-U(27)230

Dato' Indera Mohd Shahar bin Abdullah [Paya Besar] akan mencadangkan :

"Bahawa Dewan Rakyat menggesa Kerajaan menubuhkan sebuah Institut Rukun Negara bagi mengkaji dan membentangkan perancangan model literasi perpaduan jangka masa panjang menyeluruh yang akan menyelesaikan masalah polarisasi kaum yang semakin menebal dalam kalangan anak muda di negara ini. Model pendidikan jangka masa panjang ini perlu merangkumi keseluruhan aspek pembelajaran termasuk komponen subjek akademik, komponen kerohanian dan komponen etnik tanpa membelakangi peruntukkan yang terkandung dalam Perlembagaan Persekutuan dan semangat Rukun Negara. Masalah polarisasi kaum akan dilihat semakin serius jika perancangan, penekanan dan pemantauan ini tidak dilakukan segera daripada peringkat awal pembelajaran dan ia tidak dapat mencapai tahap toleransi semua kaum dan semangat kenegaraan semakin lemah dalam kalangan anak muda. Kesannya terhadap potensi untuk membangunkan negara bangsa mengikut acuan kita sendiri akan terencat dan keharmonian serta kesejahteraan negara juga akan terancam."

[Menteri Perpaduan Negara]

RISALAT-RISALAT YANG DIBAWA KE DALAM MESYUARAT
(DEWAN RAKYAT)

<u>TAHUN</u> <u>2023</u>	<u>RISALAT/DOKUMEN</u>	<u>TARIKH</u> <u>DIBENTANGKAN</u>
ST. 78	Laporan Tahunan dan Penyata Kewangan Perbadanan Harta Intelek Malaysia (MyIPO) Bagi Tahun 2021 (Telah Diaudit)	22 Mac 2023

****UCAPAN-UCAPAN**
(PERATURAN MESYUARAT 17)
(KAMAR KHAS)

Tarikh Ucapan	Ahli Yang Berucap	Tajuk Ucapan	Menteri Yang Bertanggungjawab
1. 22.03.2023 (Rabu)	1. YB Tuan Lee Chuan How (Ipoh Timor)	1. Ekonomi Penjagaan Demi Meringankan Beban <i>Primary Care</i>	1. YB Menteri Kesihatan
2. 22.03.2023 (Rabu)	2. YB Tuan Lee Chuan How (Ipoh Timor)	2. Sukan Minda dan Sukan Memori sebagai Agenda Arus Perdana	2. YB Menteri Belia dan Sukan
3. 22.03.2023 (Rabu)	3. YB Tuan Jamaludin bin Yahya (Pasir Salak)	3. Masalah Kompleks Sejarah Pasir Salak yang Telah Lama Terbiar dan Tidak Diselenggarakan	3. YB Menteri Pelancongan, Seni dan Budaya
4. 22.03.2023 (Rabu)	4. YB Tuan Jamaludin bin Yahya (Pasir Salak)	4. Kampung Warisan	4. YB Menteri Pelancongan, Seni dan Budaya

**** Ucapan Di Bawah Usul Berkenaan Perkara Tadbir Kerajaan (Peraturan Mesyuarat 17)**